

唐清涼國師澄觀疏鈔
唐方山長者李通玄論
清私淑比丘道霈纂要

大方廣佛華嚴經疏論纂要



中二冊

清私淑比丘道霈纂要

大方廣佛華嚴經疏論纂要

(中二冊)

中國·吉林長春般若寺 印贈



普爲出資及讀誦受持

輾轉流通者回向偈曰

願以此功德 消除宿現業

增長諸福慧 圓成勝善根

所有刀兵劫 及與饑饉等

悉皆盡滅除 人各習禮讓

讀誦受持人 輾轉流通者

現眷咸安樂 先亡獲超昇

風雨常調順 人民悉康寧

法界諸含識 同證無上道



長春般若寺經書

華嚴經疏論纂要(中二册)

出版發行：吉林省佛教協會
吉林省長春般若寺

地址：中國·吉林長春大街一三七號

電話：(〇四三一)八九一四七七

敬請
常念

↓南無阿彌陀佛·求生淨土

↓南無觀世音菩薩·消災降福

南無本師釋迦牟尼佛



RW11043/52

薩 菩 天 尊 陀 韋 法 護 無 南



大方廣佛華嚴經疏論纂要(中二册)目錄

卷六十七	十地品第二十六(經文卷三十六)疏論纂要之八	四一五
卷六十八	十地品第二十六(經文卷三十七)疏論纂要之九	四三三
卷六十九	十地品第二十六(經文卷三十七)疏論纂要之十	四五九
卷七十	十地品第二十六(經文卷三十八)疏論纂要之十一	五〇一
卷七十一	十地品第二十六(經文卷三十八)疏論纂要之十二	五三〇
卷七十二	十地品第二十六(經文卷三十八)疏論纂要之十三	五四八
卷七十三	十地品第二十六(經文卷三十九)疏論纂要之十四	五六二
卷七十四	十定品第二十七(經文卷四十一)疏論纂要之一	五九八
卷七十五	十定品第二十七(經文卷四十二)疏論纂要之二	六三四
卷七十六	十定品第二十七(經文卷四十三)疏論纂要之三	六五〇
卷七十七	十通品第二十八(經文卷四十四)疏論纂要	六七五
卷七十八	十忍品第二十九(經文卷四十四)疏論纂要之一	六八八
卷七十九	十忍品第二十九(經文卷四十四)疏論纂要之二	六九六
卷八十	阿僧祇品第三十(經文卷四十五)疏論纂要	七一四
	壽量品第三十一(經文卷四十五)疏論纂要	七二七
	諸菩薩住處品第三十二(經文卷四十五)疏論纂要	七二九
卷八十一	佛不思議法品第三十三(經文卷四十六)疏論纂要之一	七四〇
卷八十二	佛不思議法品第三十三(經文卷四十七)疏論纂要之二	七五八
卷八十三	如來十身相海品第三十四(經文卷四十八)疏論纂要	七七三
卷八十四	如來隨好光明功德品第三十五(經文卷四十八)疏論纂要	七八八
卷八十五	普賢行品第三十六(經文卷四十九)疏論纂要	八〇四

大方廣佛華嚴經疏論纂要卷第六十七

五臺山清涼國師澄觀疏鈔 太原方山長者李通玄論 閩鼓山私淑比丘道霈纂要

十地品第二十六之八

○第五難勝地。初明大意

〔疏〕所以來者。略有四義。一約寄位。四五六地寄出世間。前寄初果。此寄羅漢。義第故。雖有四果。舉於始終。以攝中間。此依本論。約所觀行相。以後六地既觀緣起。寄同緣覺。故但二地寄於聲聞。仁王下卷。瓔珞上卷。約人配位。以七地未離分段故。四五六七寄同聲聞。二前明覺分相應慧。今辨諸諦相應慧故。三前得出世。未能順世。今能五明攝化。故次明之。四前得三十七菩提分。今辨方便所攝菩提故。此後三意。出於瑜伽。○言難勝者。解深密云。即由於彼菩提分法。方便修習。最極艱難。名極難勝。此從初說故。初分經云。善修善菩提法故等。攝大乘云。由真諦智。與世間智。更互相違。合此難合。令相應故。唯識同此。世親釋云。由此地中。知真諦智。是無分別。知世間工巧等智。是有分智。校有分智。嘉興藏疏本作有分別。與世親釋合。此二相違。應修令合。能合難合。令相應故。名極難勝。此通初中後。瑜伽云。今此地中。顯示菩薩於聖諦決定妙智。極難可勝。名難勝地。唯約地中。莊嚴論云。於此五地。有二種難。一勸化無惱難。二生不從心無惱難。此地菩薩能退二難。於難得勝。此多約地滿。若據實位。約仁王經。初地菩薩四天王。即雙照二諦平等道。今約寄位。前寄出世。此方却入。故云無礙。○故此地中。斷於下乘般涅槃障者。即前四地出世。厭生死亡。樂取涅槃。此障五地。今入真俗無差別道。便能斷之。此斷欣厭。即是二愚。○由此證得類無差別真如。亦約生死涅槃皆平等故。○其所成行。亦成二種。謂諸諦增上慧行。五明處教化行。此二無礙。故得

無差別法身之果。皆義旨相順。鈔無差別法身。二諦均故。故疏結云。義旨相順。

論何故名為難勝地。為以禪波羅蜜發起善根。慈悲喜捨。通達世法。下地不如。故名難勝地。又明以定體善知世法無定亂性。勝於定亂。故名難勝地。為過三界惑。復不證涅槃。三界及涅槃。總不能壞其無依住之智慧。故名難勝地。

○次正釋文。文亦三分。初讚請分。

菩薩聞此勝地行。於法解悟心歡喜。空中雨華讚嘆言。善哉大士金剛藏。

疏讚請分中九頌半。分二。初八頌半供讚。後一頌請說。前中三。初一菩薩供讚。

自在天王與天衆。聞法踊躍住虛空。普放種種妙光雲。供養如來喜充徧。

疏次一天王衆。餘皆天女。

天諸采女奏天樂。亦以言辭歌讚佛。悉以菩薩威神故。於彼聲中發是言。

疏於中三。初一偈標。

佛願久遠今乃滿。佛道久遠今乃得。釋迦文佛至天宮。利天人者久乃見。

大海久遠今始動。佛光久遠今仍放。衆生信遠始安樂。大悲音聲久乃聞。

疏次四偈半讚。於中初二偈美感應。皆言久者。佛應由機。機難有故。大海動者。動佛智海。竭苦海故。

功德彼岸皆已到。憍慢黑暗皆已滅。最極清淨如虛空。不染世法猶蓮華。大牟尼尊現於世。

譬如須彌出巨海。供養能盡一切苦。供養必得諸佛智。此應供處供無等。是故歡心供養佛。

疏後二偈半。讚具德。初偈具智斷。次半具恩。後一具此三德。是故應供。

如是無量諸天女。發此言辭稱讚已。一切恭敬喜充滿。瞻仰如來默然住。
是時大士解脫月。復請無畏金剛藏。第五地中諸行相。唯願佛子爲宣說。

疏三二偈。結讚。及請說。並可知。

○第二正說分中。先明位行。後辨位果。前中論分爲三。初勝慢對治。二佛子菩薩摩訶薩如實知下。不住道行勝。三佛子菩薩摩訶薩住此下。明彼果勝。初即加行道。及初住地無間道。次即正住地解脫道。後即地滿勝進道。初言勝慢者。慢有二種。一他地慢。謂四地中得出世智。取其勝相。名爲勝慢。今以十種淨心爲治。二自地慢。謂於此十心希求勝相。復以爲慢。以隨順如道爲治。此二通名勝慢。故此一分。有其二道。文中二。先治他地慢。後佛子菩薩摩訶薩住此下。治自地慢。前中三。初結前舉後。二徵起正顯。三結能入地。今初。

爾時金剛藏菩薩。告解脫月菩薩言。佛子。菩薩摩訶薩第四地所行道善圓滿已。欲入第五難勝地。當以十種平等清淨心趣入。

疏平等有二義。一是如理。二是因果淨法。千聖同規。名深淨心。是此地觀解故。論云。於平等中。心得清淨故。**鈔**言深淨心。即是論經。今經但云清淨心耳。此復何異。後地觀察十平等法。此有三異。一此地治前於淨起慢。故偏明淨法平等。後地對此依真入俗。通觀染淨諸法皆悉平等。二此約舉等理以顯心淨。後地舉觀察以入等理。三此通理事二等。後地一向約理。融二諦故。此皆地地背相捨離。後漸勝故。此有三下答。一所治通局。通染則勝。二能所前後。若舉所等以成能等。此心猶淺。若舉能觀以入所觀。此觀則深。三能治通局。一向局理。六地則深。故疏結云。此皆地地背相捨離。以勝捨劣。

○二正顯十心。

何等爲十。所謂於過去佛法平等清淨心。未來佛法平等清淨心。現在佛法平等清淨心。戒平等清淨心。心平等清淨心。除見疑悔平等清淨心。道非道智平等清淨心。修行智見平等清淨心。於一切菩提分法上上觀察平等清淨心。教

化一切衆生平等清淨心。

〔疏〕十心分二。初三明諸佛法。論云。謂三世力等者。即果位十力等也。〔鈔〕即果位者。此一等字。等餘果法。謂四無所畏。十八不共。三身四智等。非釋平等。平等淨心。前已總釋。後七明隨順諸佛法。二利因行。順成果故。於中前六自利。後一利他。前中合爲三學。初戒。次定。餘四慧故。離爲七淨。一戒淨。二定淨。三見淨。四度疑淨。見疑相顯。經合一句。爲成十故。五道非道淨。此前五淨。大小名同。小乘六名行淨。七行斷淨。以彼宗中趣盡滅故。今大乘六名行斷。經云。修行智見。略無斷字。七名思量菩提分法。上上淨。以依行斷。起勝求故。

○三結能入地。

菩薩摩訶薩。以此十種平等清淨心。得入菩薩第五地。

〔疏〕可知。

○第二治自地慢。論明如道行。又順經意。前明入心。從此已下。皆明住心。應分爲三。此攝方便具足住。修行十心。是方便義。不退轉者。即是住義。二不住道行勝。攝離癡亂行。智清淨等無癡亂故。三彼果勝。攝無盡功德藏迴向。攝德無盡故。今且順論。此明如道行。

佛子。菩薩摩訶薩。住此第五地已。『以善修菩提分法故。善淨深心故。復轉求上勝道故。隨順真如故。』願力所持故。於一切衆生慈愍不捨故。積集福智助道故。精勤修習不息故。出生善巧方便故。觀察照明上上地故。受如來護念故。念智力所持故。得不退轉心。

〔疏〕於中三。初標分位。爲顯隨如已入五地。次以善下。總顯。後願力下。別明。二總顯中四句。皆是正修諸行。故總名順如。謂前二句爲所治。即四地修菩提分。以前十心。能善清淨。得入五地。於此淨心。希求勝相。即復是慢。慢在文外。

故以後二句而爲能治。初句轉求不住道行勝爲能治。謂不住淨心而起諸行。即治住淨慢故。後句雖起諸行。不退失前平等深淨之心。則能隨順真如。平等即如故。後別明中。顯上隨如之行。有其八種。經有九句。前七各一。後二爲一。八中前二是起行心。一自利願。即修菩提心。二利他慈。即不疲倦心。後六是行。謂三得善根力。四不捨衆行。五善巧修行。六無厭足故。照明上上。七得他勝力。八自得勝力。此有二句。初句具三慧。念是聞思。智即修慧。後句勝進究竟。上六行中。前三自分。後三勝進。各有初中後。思之。鈔後別明者。問。八皆事行。何名如行。答。有二意。一此助顯真如觀故。二如中起行。俱無所著。方顯隨如。初勝慢對治竟。

○第二不住道行勝。有二種觀。一所知法中智清淨勝。二佛子至得如是諸諦下。利益衆生勤方便勝。初即自利護煩惱行。故不住世間。後即利他護小乘行。不住涅槃。同時相導。名不住道。今初智勝。分二。先明四諦實法分別。後善知俗下。復就此四。明十觀門。化生差別。此乃十種觀於四諦。非謂觀十四諦也。故瑜伽住品云。此地於四聖諦。由十行相。如實了知。今初。

佛子。此菩薩摩訶薩。如實知。此是苦聖諦。此是苦集聖諦。此是苦滅聖諦。此是苦滅道聖諦。

〔疏〕言實法者。有佛無佛。苦集二諦。體是妄想雜染因果。滅道二諦。體是出世清淨因果。此約諦實義釋。若約審諦釋者。前二無佛。不能知此是苦是集。寧有後二滅道果因。餘如本品。鈔一所知者。諦是所知之法。智於其中。照見離垢。故名清淨。慈悲攝物。名利益衆生。無情稱勤。善巧爲方便。

○後十觀中。略啓四門。一制立。謂四諦義含法界。菩薩窮照無遺。隨智異說難窮。略舉十明無盡。然十皆菩薩自智。智相難明。故論約化生以明其異。以此通名所知法中智清淨也。二明開合。此十總唯是一化生分別。若隨所化大小分二。前九化小。後一化大故。若隨化所起。則分爲三。前五生解。次四起行。後一令證故。約人不同。離以爲七。初爲根未熟。乃至七爲大乘可化故。至文當知。三對實法以明通別。此十望前四諦。前五通觀四諦。謂一世俗者。觀四諦

法相。二觀其性空。三通觀性相無礙。四觀性相各異。五觀此四緣起集成。次四別觀四諦。謂六七八九。如次觀苦集滅道。後一但觀滅道。菩薩地因。證佛智故。四正釋文。文分爲二。初列十名。

善知俗諦。善知第一義諦。善知相諦。善知差別諦。善知成立諦。善知事諦。善知生諦。善知盡無生諦。善知入道智諦。善知一切菩薩地次第成就諦。乃至善知如來智成就諦。

○二次第解釋。

此菩薩隨衆生心樂令歡喜故。知俗諦。通達一實相故。知第一義諦。覺法自相共相故。知相諦。了諸法分位差別故。知差別諦。善分別蘊界處故。知成立諦。覺身心苦惱故。知事諦。覺諸趣生相續故。知生諦。一切熱惱畢竟滅故。知盡無生智諦。出生無二故。知入道智諦。正覺一切行相故。善知一切菩薩地次第相續成就。乃至如來智成就諦。以信解智力。非以究竟智力知。

疏依本論攝十爲七。初一爲根未熟衆生。謂未堪入大。爲說四諦十六行等。名知四諦。即四重二諦中第三重內俗也。不同瑜伽。通於大小。及根生熟。鈔爲說四諦等者。謂苦下有四。即苦。空。無常。無我。集下有四。集。因。生。緣。滅下有四。滅。靜。妙。離。道亦有四。道。如。行。出。故是俗諦。即四重者。一假實二諦。二事理二諦。三四諦勝義二諦。四安立非安立二諦。廣如玄中。今是第三重中俗者。以四諦爲俗故。二爲根熟堪入大故。爲說法空第一義諦。三爲疑惑衆生。故知相諦。謂有聞第一義諦。猶預不決。若是空耶。則無因果。若是有耶。云何言空。今明即俗自相是空。共相俱處無違。故名相諦。四爲謬解迷惑深法衆生。故知差別。謂前緣二境。故名爲疑。今聞俱處。便謂是一。名爲謬解。今明體雖不異。性相分位。歷然差別。五爲離正念衆生。故知成立諦。謂既聞差別。謂皆有體。名離正念。今明差別。但是緣成。無有自性。故云成立。六爲正見衆生。知事等四諦。由無前疑執。故名正見。可令苦斷集證滅修道。事即苦諦。生即集因。無生是滅。因亡曰盡。即盡智也。後果不起。名爲無生。即無生智也。若小乘說。現在惑亡。說名爲盡。利根之人。保彼煩惱當更不起。名曰無生。此盡無生。是其滅體。無學之智。如是而

知意在取滅。故爲滅諦。道言無二者。論下重釋。云一行故。謂稱滅而知。故云一行。前列實法四諦明其所觀。此中四諦。明當如是觀。七爲大乘可化衆生。故知菩薩地。乃至如來智諦。謂先住大乘。化令進故。言正覺一切相者。大乘要須於五明處善巧知故。菩薩地是因。言次第相續者。如從初地入二地。乃至十地入佛地大果也。以信解等者。爲釋外疑。六地已上。乃至佛智。未曾證入。彼云何知。故此釋云。信解鏡像觀智力知。非成就智。鏡像即影像觀。未得本質故。未得本質者。本質有二。一約未證佛智。則佛智爲本質。二既未證於如來之智。於一切智所知之法。即是本質。亦影象知。一切所證。未親證故。校即是本質。纂要及金陵會本誤作既是本質。茲據嘉興藏南藏鈔本及續藏會本改下。

論第四佛子已下。至究竟智力知。有十四行半經。明善知十諦法門分。釋義中。復分爲兩段。一佛子已下。至善知如來智成就諦。有六行經。明此位菩薩善知十種諦法門分。二此菩薩隨衆生心樂已下。有八行半經。明便述知諦之所由。經自釋訖。如第一段中。善知此苦聖諦者。不同三乘厭苦欣淨。方求聖諦故。但達此世間諸苦體無故。即苦無滅性。道無生性。當知苦體。即不生不滅。即與聖道無二性故。故云善知苦聖諦。已下四聖諦。總如之。已下諸諦義。如經自具。一所知法中智清淨勝竟。

○第二利益衆生勤方便中二。先總起悲觀。二別起悲觀。今初。佛子。此菩薩摩訶薩得如是諸諦智已。『如實知一切有爲法。虛妄詐僞。誑惑愚夫。』菩薩爾時於諸衆生轉增大悲。生大慈光明。

疏總中三。初結前。次如實下。觀過。後菩薩下。起悲。觀過中。先明非真。後誑惑下。對人影過。今初。虛妄二字。觀內五蘊。謂妄想常等不相似無故虛。此明所取非真。理無不同情有。故云不相似無也。常作我想慢事故妄。此辨能取不實。非有計有。常樂我淨。皆名我想。非唯我見。我爲本故。獨云我想也。詐僞二字。觀外六塵。世法牽取愚夫故詐。此顯能取迷真。謂由妄取。令彼世法隱虛詐實。使其貪取也。世法盡壞故僞。此明所取不實。世法相似相續。似有義利而

實速滅無理故。後對人彰過者。上虛偽二境引心。總名為誑。妄詐二心迷境。皆名為惑。愚夫即是依彼正取我慢之人。三起慈悲者。憐愍故悲。勝利益故慈。不住道行勝。故云轉增。皆言大者。勝前地故。云光明者。救生方便智成故。轉增光明。俱通慈悲。文有影略。轉前慈愍。分同諸佛故名爲生。

○第二別起悲觀中二。先明化生願。二明化他心。今初。佛子。此菩薩摩訶薩得如是智力。不捨一切衆生。常求佛智。

〔疏〕先牒前。得是智力。近牒觀有爲。遠牒觀諸諦。不捨衆生。牒前慈悲。後常求佛智。正明起願。願救衆生義故。

○二化心中二。先明大悲觀。後佛子菩薩摩訶薩復作是念。此諸衆生下。明大慈觀。前中悲有二相。一如實觀苦。因緣集故。即知苦體性。二觀深重苦。久而多故。即就人彰過。今初。

如實觀一切有爲行前際後際。〔知從前際無明有愛故。生死流轉。於諸蘊宅不能動出。增長苦聚。無我。無壽者。無養育者。無更數取後趣身者。離我我所。如前際。後際亦如是。皆無所有。〕虛妄貪著。斷盡出離。〔若有若無。皆如實知。〕

〔疏〕前中四。初總標二際。二知從下。順觀二際。三虛妄下。逆觀二際。四若有下。結如實知。今初。前即過去。後即未來。顯無始終。流轉相故。二順觀中二。先明前際。後如前下。類顯後際。前中復二。先顯緣集苦聚。後無我下。顯二空無我。今初。無明有愛。顯流轉因。能發能潤。此以爲本故。生即是果故。涅槃云。生死本際。凡有二種。一者無明。二者有愛。是二中間。有生老死。今菩薩觀此而起大悲。亦同淨名。從癡有愛。即我病生矣。然生果有三。一欲求衆生。故流轉生死。欲貪即是受身本故。二妄梵行求衆生。故於蘊宅不能動出。外道計我。常住其中故。三有求衆生。故增長苦聚。三有皆苦故。後顯空無我。及類顯後際。并顯可知。三逆觀中。順即苦集。逆即道滅。虛妄斷盡。即是滅也。出離是道。四結如實知。即雙結二際。逆順有無三義。一約凡夫。但有苦集。而無滅道。二約菩薩。逆有順無。三雙約凡聖。真滅本有。道亦

符之。妄苦本空。集亦同爾。凡夫迷故。不覺不知。菩薩正了。名知如實。校逆有順無。嘉興藏南藏疏本續藏及金陵會本作順有逆無。

○第二觀深重苦。

佛子。此菩薩摩訶薩復作是念。此諸凡夫。愚癡無智。甚為可愍。『有無數身。已滅。今滅。當滅。』如是盡滅。不能於身而生厭想。『轉更增長機關苦事。隨生死流。不能還返。於諸蘊宅。不求出離。』不知憂畏。四大毒蛇。不能拔出。諸慢見箭。不能息滅。貪恚癡火。不能破壞。無明黑暗。不能乾竭。愛欲大海。不求十力大聖導師。入魔意稠林。於生死海中。為覺觀波濤之所漂溺。

疏深重苦者。無始隨逐故深。種種苦事故重。文中二。校二。纂要誤作三。初總標可愍。不知本空。故名愚癡。不知厭離。故云無智。亦可俱通。故為可愍。二有無數下。釋可愍所由。由迷二苦故。初明深苦不知。故為可愍。後如是盡下。明重苦不知。故為可愍。於中二。初牒前訶後。二轉更下。正明重苦。於中三。初觀生苦。機關苦事。即是生苦。言機關者。顯無我故。抽之則動。息手便無。若造業因。生生不息。隨生死下。明有集愛。於諸蘊下。明離滅道。二不知下。觀老病死。四大毒蛇。是不知病苦。不能拔下。明具彼集。文有四句。一妄梵行求衆生。不能拔出。諸慢見箭。外道多起故。二欲求衆生受欲者。不能息三毒火。三欲求衆生行惡行者。不破無明。以見少利。行大惡行。後受大苦。故云黑暗。四有求衆生。不竭愛欲大海。三有之愛。廣無邊故。觀如實中。說彼三求。以為苦果。今為集者。三求皆能為集。因而受果故。二文互舉。次不求十力大聖導師。明遠彼滅。不向滅者故。入魔意下。明遠彼道。順怨道故。鈔二欲求者。欲求開二。一縱情五欲。不懼當報。是造惡行者。二但耽五欲。未必造惡。今是此人。二於生死下。總結過患。舉生死海。總顯於苦。覺觀波下。總明有集。此中兼顯死苦之義。略不明老。

○二大慈觀中二。初觀境興慈。後廣願饒益。今初。

佛子。此菩薩摩訶薩復作是念。此諸衆生受如是苦。孤窮困迫。『無救無依。無洲無舍。無導無目。無明覆翳。黑暗纏裹。』我今爲彼一切衆生。修行福智助道之法。獨一發心不求伴侶。以是功德。令諸衆生畢竟清淨。乃至獲得如來十力無礙智慧。

〔疏〕文中二。先覩境。後我今下。興慈。初即覩前衆生受深重苦以爲慈境。文中先總。無救下。別。總中。無父曰孤。明前無所恃。塗盡曰窮。明後無所依。任重無替曰困。常受生死故。強力所逼曰迫。業惑所陵故。後別中。無救無依。釋上孤義。論云。謂現報已受。不可救脫。當報因招。無善爲依。次無洲無舍。釋上窮義。溺於覺觀波濤。不聞正法。智洲爲對治故。在於生死曠野。不爲善友慈捨庇故。次無導無目。釋上困義。離於寂靜正念。思惟究竟前導故。離於正見之明目故。既無導無目。非因而何。次無明下。釋上迫義。無明者。無明住地。舊煩惱故。黑暗者。四住客塵故。常起邪念。故爲其覆翳。不聞正法。故爲彼纏裹。二興慈中。獨拔修善。令物得菩提涅槃之樂。〔鈔〕二興慈中。經有三節。一爲物修因。二獨一下。孤標大志。三以是下。以善益物。初令淨障爲涅槃因。及畢竟清淨。亦涅槃果。後乃至下。疏總釋義。亦已周圍。

○第二廣願饒益。亦彰慈所爲。

佛子。此菩薩摩訶薩。以如是智慧觀察。所修善根。皆爲救護一切衆生。『利益一切衆生。安樂一切衆生。哀愍一切衆生。成就一切衆生。解脫一切衆生。攝受一切衆生。』令一切衆生離諸苦惱。令一切衆生普得清淨。令一切衆生悉皆調伏。令一切衆生入般涅槃。

〔疏〕文中二。先牒前。總明上來修善。皆爲救護。即是慈相。〔鈔〕先牒前者。略舉修善。實則兼前智慧觀察。見生有苦有惡。無治無救。故修善根而爲饒益。皆慈相也。以善智慧能饒益故。後利益下。別顯救護。有十種相。前二爲救未來。後八通於現未。一住不善衆生。令住善法利益。二住善法衆生。令得安樂果。謂成彼善故。三愍貧乏者。與資生具。四修行多障者。令其成就。上二救順緣不足苦。五世間繫閉者。令得解脫。下有五種。令諸外道。信解正法。謂六未信。攝令正信。七令離無利勤苦。入疑惑。

衆生疑除解淨。九已住決定。勤校勤嘉興藏南藏疏本續藏會本作勤。與地論合。修三學。以調三業。十已住三學。令得涅槃。上三即解行證。論意皆爲外道。理實後三兼通餘類。上來不住道行勝竟。

○自下大文第三明彼果勝。即不住道行勝之果。有四勝果。一攝功德勝。二修行勝。三教化衆生勝。四起隨順世間智勝。四中初二自利。即所知法中智清淨果。初自分。後勝進。後二即利他勤方便果。前化他行。後化他智。今初。

佛子。菩薩摩訶薩住此第五難勝地。名爲念者。不忘諸法故。名爲智者。能善決了故。名爲有趣者。知經意趣。次第連合故。名爲慚愧者。自護護他故。名爲堅固者。不捨戒行故。名爲覺者。能觀是處非處故。名爲隨智者。不隨於他故。名爲隨慧者。善知義非義句差別故。名爲神通者。善修禪定故。名爲方便善巧者。能隨世行故。

疏初攝功德中十句。初二攝聞勝。然有二義。一即三慧。如次配聞思修。二顯二持。念即聞持。智及有趣。即是義持。義有多種。略說二種善巧。謂智即法智勝。有趣即義智勝。然二釋。皆聞在初。故論名攝聞勝。次二攝戒勝。一忍辱柔和勝。即戒因成也。謂內懷慚愧。不誑幽明。自護七支。不招譏毀。故能持戒。二戒無缺勝。即戒體成也。乃至命難。不捨戒故。鈔一忍辱者。能忍他惱。名爲忍辱。能將護他。說爲柔和。以柔忍故。緣不能動。二皆拒惡。故名爲愧。唯崇戒善。故稱爲慚。謂內懷下。釋慚愧相。慚者羞天。故不誑幽。愧者羞人。故不誑明。不招譏毀。即是護他。乃至命難者。釋堅固言。鵝珠草葉。即命難也。後五攝智勝。一者因緣集智。此知法相智。無因倒因。名爲非處。正因緣集。名之爲處。知處治於非處。故名覺者。二者證智。知魔事對治。隨識分別。皆摩事故。三知妄說智。異說對治。即知教智。正說爲義句。邪說爲非義句。邪正交雜。揀邪得正。名善分別。四神力起用智。依定起通。治邪依故。五化衆生智。折伏攝受。隨世宜故。上五中。前三自利。後二利他。

○第二修行勝。

名爲無厭足者。善集福德故。名爲不休息者。常求智慧故。名爲不疲倦者。集大慈悲故。名爲爲他勤修者。欲令一切衆生入涅槃故。名爲勤求不懈者。求如來力無畏不共法故。名爲發意能行者。成就莊嚴佛土故。名爲勤修種種善業者。